

## ■ GLOSSA

# As fidar da la stgellera(?)

DA AITA DERMONT-STUPAN

**T**ge guardas usche sceptic, m'aveva ditg ina giada in ami che jau admirava. Igl era ad in concert da roc. Tut ils fans eran sin pe e sblatschavan ils mauns sur il chau. Ina fulla da glieud, ina canera enorma. Jau m'aveva tratga in pau dalla vart.

**T**ge guardas usche sceptic, era el passà speravia senza spetgar ina resposta. Per mai era quai stà sco ina rinfatscha. Gugent vess er jau, sco tschels sblatschà ils mauns sur il chau e ma muventada suenter il ritmus da las chanzuns, ma insatge en mai sa dustava. Anc pliras giadas ma grittentesch jau da quest tratg sceptic en mai che ma retegn e na lascha agir spontaneamente.

**V**airamain sun jau averta per novas chaussas, beneventesch il svilup, hai fidanza en la vita ed en ils conumans. Ma savens ma pari che quests umans sa muventian sco nursas en ina muntanera tenor il splin da la stgellera.

**P**oss jau ma fidar da la stgellera? Per nagut na mettani pasturs ad alp. Na stoss jau prender mezza

la respunsabilitad e la libertad da star airi, u ir in'otra via sche jau chat quai per bun? Ma fidar be dal «bun pastur».

**S**urprender la respunsabilitad vul dir as occupar da la chaussa, as informar, metter sin stadaira, giudigar, decider. Ma sche jau vi far quai cun tut las chaussas che vegnan mintgadi da chasa en, sche jau vi metter en dumonda tut, vegn jau balurda! Jau na poss savoir tut!

**N**agin na sa tut. Perquai cler che mintgin sto as spezialisar sin ses champ, provar da vegnir almain là landerora. Perquai datti spezialists che s'occupan da lur fatg, per ch'ils laics possian profitar da lur savida, as fiaar dad els ed als seguir.

**E**tgenin è voss champ d'actività, em'ha dumandà tschella saira il directur d'ina gronda firma a Basel, (nus sesevan per cas in sper tschel a la festa d'anniversari da mia amia) suenter che jau aveva tadlà almain in'ura, na senza interess, da sia lavur. da sia figlia che studegia actura da teater e da ses figl che è dentist...

**M**es champ d'actività? Jau sun stada perplexa da la dumonda. Tge fatsch jau? Avev'jau ussa da cumenzar a raquintar tge ch'jau trafitgia mintga di sco mamma e chasarina, da mes champ da tartuffels, da mias giallinas, mias lecziuns da rumantsch ad uffants esters, che jau gidia mintgatant a vender en la butietta, detti gimnastica als attempads e detti uras da flauta e nettegia ina abitaziun da vacanzas la sonda, da mes artitgels che jau scriv dus giadas l'onn en gassetta!

**M**erda! Nagliu na sun jau spezialista! Jau fatsch dal tut e nagut «endretg». Dapertut sun jau, cumpareglià cun spezialists, in pover vaglianagut.

**T**genin champ? Il champ da graun savura da terra. Ed jau ma cuffort l'auter di che jau sun almain dastrusch a quella. E quai ma bastass en fund... Ma sco chi giran la chaussas decidan adina ils spezialists. Adina ma stoss jau fidar dad els.

**A**dina puspè ma sent jau chatschada en questa muntanera, dependenta da la stgellera. Al diavel, jau na ma fid propi dad ella.